

## DOMENIE XV «VIE PAL AN»

### Antifone di jentrade Sal 16,15

**J**o te justizie o vuei podê cjalâ la tô muse,  
cuant che mi dismôf, o vuei saciâmi dome cul cjalâti.

### Colete

Diu, che tu ur mostris ai straviâts la lûs de tô veretât  
par che a puedin tornâ in strade,  
dâur a ducj chei che si professin cristians  
di rifudâ dut ce che al contraste cun chest non  
e di tignî ce che al è convenient.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Is 55,10-11

**La ploe e fâs butulâ la tiere.**

Dal libri dal profete Isaie  
Cussì al dîs il Signôr:  
«Come la ploe e la nêf  
a vegnin jù dal cîl e no tornin sù plui,  
cence vê imbombade la tiere,  
fate lâ in amôr e butulâ,  
in mût di furnî la semence al semenadôr  
e il pan a di chel che al mangje,  
cussì e sarà la mê peraule  
che e salte fûr de mê bocje;  
no tornarà indaûr chi di me cence efiet,  
cence vê fat lâ in quart ce che o volevi,  
e quartât al colm ce che le vevi mandade a fâ».  
Peraule di Diu.

### SALM RESPONSORIÂL dal Salm 64

**R.** Tu tu vegnis a viodi de tiere, Signôr,  
e tu benedissis i siei butui.

Tu sês vignût a viodi de tiere  
e di ogni ben tu le âs colmade,  
tu le âs fate ricje di no crodi.  
Il flum di Diu al è incolm di aghe;  
il forment par lôr tu preparis. **R.**

Parcè che chest al è il to volê:  
tu bagnis i siei agârs e tu 'nt splanis lis cumieriis,  
tu le bagnis cu lis plois  
e tu benedissis i siei butui. **R.**

Tu i dâs la jemple al an cui tiei regâi  
e cuant che tu passis e gote bondance.  
I passons dal desert a spissulin,  
lis culinis si fassin di ligrie. **R.**

I prâts si jemplin di pioris

e lis concjis di forment si vistissin:  
lôr a scriularan e a daran sù la cjante. **R.**

### **SECONDE LETURE Rm 8,18-23**

**Lis robis creadis a spietin la manifestazion dai fîs di Diu.**

De letare di san Pauli apuestul ai Romans

Fradis, o pensi che i patiments di chest timp culì no son di meti a confront cu la glorie che si palesarà in nô.

Ancje lis robis creadis a spietin spasimant la manifestazion dai fîs di Diu. Di fat lis robis creadis a son stadis sometudis al nuie dal pecjât – no par volontât lôr ma di chel che lis à sometudis – cu la sperance che ancje lôr a saran sfrancjadis de coruzion par vê la libertât de glorie dai fîs di Diu. O savìn che dutis lis robis creadis a zemin e a patissin insieme, fin a chest moment, lis dois dal part. No dome lôr ma ancje nô, che o vin il prin don dal Spirt, o zemìn dentri vie spietant di jessi fats fîs di anime, riscatâts tal nestri cuarp.

Peraule di Diu.

### **CJANT AL VANZELI cf. Mt 13,19.23**

**R.** Aleluia, aleluia.

La semence e je la peraule di Diu

e Crist al è il semenadôr:

chel che lu cjate lui, al à la vite eterne.

**R.** Aleluia.

### **VANZELI Mt 13,1-23**

**Il semenadôr al saltà fûr par semenâ.**

Dal vanzeli seont Matieu

In chê dì Jesù, saltât fûr di cjase, al jere sentât ad ôr dal mâr. Stant che si jere dade dongje ator di lui une grande fole, al montà suntune barcje e al restà sentât, biel che dute la fole e jere su la rive.

Alore ur fevelà a lunc in parabolis.

Ur disè: «Ve: un semenadôr al saltà fûr par semenâ. Tal butâ la semence, une part e colà dilunc fûr pe strade; a rivarin i ucei e le mangjarin. Une part e colà tun teren dut plen di claps, là che no jere cuissà ce tiere; e cussì, par vie che la tiere no jere fonde, e nassè daurman. Cuant che però al jevà il soreli, si arsinè e, no vint lidrîs, si secjà. Une part e colà framieç des spinis e chês, cul cressi, le scjafoiarin. Par ultin, une part e colà sul teren bon, che di fat e butà di une bande il cent, di un'altre il sessante e di un'altre ancjemò il trente. Chel che al à orelis, che al scolti!».

I lerin dongje i siei disepui e i domandarin: «Parcè mo ur fevelistu in parabolis?».

Lui ur rispuindè: «Parcè che a vualtris us è dât di capî i misteris dal ream dai cîi e a lôr invezit no.

Di fat a chel che al à i sarà dât e al varà bondance, ma a di chel che nol à i vignarà cjolt ancje ce che al à. Par chel ur feveli in parabolis, par che viodint no viodin, sintint no sintin e no capissin. Cussì si colmarà par lôr la profezie di Isaie, là che al dîs: “O scoltarês, ma no capissarês, o cjararês ma no viodarês. Di fat il cûr di chest popul si è indurît, a son diventâts dûrs di orele, a àn sierâts i vôi, par no viodi cui vôi, no sintî cu lis orelis, no capî cul cûr e convertîsi, e jo ju vuarissi”.

Furtunâts invezit i vuestris vôi che a viodin, lis vuestris orelis che a sintin. Parcè che us al dîs in veretât: une vore di profetis e di juscj a àn bramât di viodi ce che vualtris o viodês e no lu àn viodût, di sintî ce che vualtris o sintîs e no lu àn sintût!

Vualtris duncje o capîs la parabule dal semenadôr. Se un al scolte la peraule dal ream e no le capîs, al ven il trist e al puarte vie ce che al è stât semenât intal so cûr: cheste e je la semence colade dilunc fûr de strade. Chê colade sul teren plen di claps e je il spiel di chel che al scolte la peraule e le ricêf daurman cun gjonde, dome che nol à in sè lidrîs ni tignince; a pene che e capite une tribulazion o une persecuzion par colpe de peraule, al cêt dal moment. Chê colade framieç des spinis e je il spiel di chel che al scolte la peraule ma dopo, midiant che lis preocupazions di chest

mont e la passion pes ricjecis a scjafoin la peraule, al reste cence prodot. Chê invezit che e je colade sul teren bon e je il spieli di chel che al scolte la peraule e le capîs; chel al bute e al rint di une bande il cent, di un'altra il sessante e di un'altra ancjemò il trente».

Peraule dal Signôr.

### Su lis ufiertis

Cjale, Signôr, i regâi de tô Glesie in preiere e dâur la gracie a di chei che ju ricevin di cressi inte santitât e inte fede.

Par Crist nestri Signôr.

### Antifone a la comunion Sal 83,4-5

Ancje la passare e cjate une cjase  
e il so nît la cisile dulà poiâ i siei piçui,  
dongje dai tiei altârs,  
Signôr des schiriis, gno Re e gno Diu!  
Furtunâts chei che a vivin inte tô cjase:  
a puedin cjantâ lis tôs laudis cence polse.

### O ben: Zn 6,56

Chel che al mangje la mê cjar e al bêf il gno sanc,  
al reste in me e jo in lui, al dîs il Signôr.

### Daspò de comunion

Daspò di vê ricevût il to regâl, ti preìn, Signôr,  
che, celebrant dispès i tiei misteris,  
e cressi in nô ancje la vore de tô salvece.  
Par Crist nestri Signôr.